



## BEN TORNÂT!

Sì, ben tornât; parcè che se tu stâs leint chestis riis e no sin ancjemò ai 25 di Otubar, dôs a son lis robis: o tu sês un **Contecurtâr**, o tu sês cualchidun che, intune maniere o ta chê altre, al steve daûr a **la nestre Ostarie viere** sul blog di Splinder.

In ogni câs, ben rivât in chest lûc, che al sarà la **gnove cjase virtuâl de Ostarie Leterarie CONTECURTE**, che tu tu varessis za di cognossi.

O vin pensât, di fat, di invidâ i nestrîs letôrs e scritôrs plui afezionâts une setemane prin de vierzidure uficiâl de **gnove Contecurte**, ancje se magari o sin ancjemò daûr a meti a puest lis ultimis cjadreis e a netâ il polvar dai lavôrs che o vin fat in chescj mês di polse.

Nûs pareve biel meti adun chest **licôf**, e intindilu come inte ete antighe, come un moment di fieste, un rituâl che al sedi di bon auguri par cheste **gnove Ostarie, rinovade e insiorade**, cirint di meti ordin intai vins di une volte e fantasie in chei gnûfs, che o vin pronts **daûr dal bancon**.

Si che duncje, a voaltris che o sês aromai di cjase, us lassìn il timp di cjalâsi ator, di fracâ ducj i botons che o cjatais, di curiosâ in ducj i scansei e començâ a nasâ i vins gnûfs che o vin di ufrî.

Si inacuarzarês che o vin **augmentât l'organic**, metint dongje al **Ustîr** e al **Ustîr in Seconde**, no dome il **Camarîr**, che al è stât confermât a timp indeterminât, ma ancje un **Garzon**, une vore brâf, e un **Famei**, cuntune vore di snait. E si inacuarzarês ancje che o vin insiorât la nestre ufiarte, jemplant il camarin e lis scansiis di vins diferents des contis, ancje se a àn simpri a cefâ cun lôr.

Cun di plui, o vin cirût di comedâ i difiets che a saltavin fûr inte Ostarie viere, che no vin vendude, ma le vin lassade come che e sta, pronte par lâ a cirî cualchi conte, se al covente, partint dai leams inte pagjine dedeade ai **Contecurtârs**. Anzit, o domandìn propit a chescj,

di butâ un voli ae lôr sezion e dînus cuntune mail se a àn voie di inzornâ la biografie o di zontâ/gjavâ alc.

Judâts dai imprescj informatics che cheste gnove cjase virtuâl nus met a disposizion, nus somee che la ggestion dai coments, des informazions e dai articui e sedi plui valide e che la Ostarie e sedi plui comude e plasevule. Cussì, intant che nô o lin indevant a comedâ lis ultimis faloputis di grafie e a picjâ i ultins quadris tai mûrs, voaltris invidâts prin de inaugurazion uficiâl, che e je previodude, apont, par lunis ai 25 di Otubar, o podês bielzà començâ a doprânus, vignintnus daûr cun google o cul muselibri, su la colone di çampe, e disintnus **ce che us pâr di cemût che a van indevant i lavôrs.**

Intant nô, cun cheste setemane, o començarìn za cu lis publicazions.

Un salût a ducj, e ancjemò une volte: **BENTORNÂTS.**

**Chei di Contecurte**